

NO SOALAN :39

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATO' WIRA OTHMAN BIN ABDUL
(PENDANG)**

PERTANYAAN : LISAN

TARIKH : 09.11.2017

Y.B. DATO' WIRA OTHMAN BIN ABDUL [PENDANG] minta **MENTERI KEWANGAN** menyatakan adakah Kerajaan bercadang untuk menghapuskan GST ke atas input pertanian yang disalurkan melalui Pertubuhan Peladang bagi mengurangkan beban para petani.

JAWAPAN

Tuan Yang DiPertua,

Untuk makluman Ahli Yang Berhormat, buat masa ini Kerajaan belum bercadang untuk menghapuskan GST ke atas input pertanian. Pengenaan GST ke atas input pertanian seperti baja dan perkhidmatan membajak adalah tertakluk kepada kenaikan GST dan

pengenaan GST ke atas input ini juga adalah seragam ke atas semua jenis industri. Bagi sektor pertanian, petani atau Lembaga Pertubuhan Peladang boleh menuntut kredit cukai input sekiranya berdaftar GST. Bagi petani yang tidak berdaftar kerana tidak mencapai *threshold*, Kerajaan telah memperkenalkan satu skim yang dinamakan sebagai Skim Kadar Rata (*Flat Rate Scheme* - FRS) di bawah Akta Cukai Barang dan Perkhidmatan 2014.

Skim FRS ini terpakai kepada pekebun, petani dan nelayan yang mempunyai nilai jualan tahunan kurang daripada RM500,000. Mereka yang berdaftar di bawah skim ini boleh mengenakan tambahan 2% ke atas nilai jualan/produk yang dijual kepada pemborong dan amaun tersebut boleh disimpan untuk *offset* dengan GST yang telah dibayar ke atas input pertanian. Melalui Bajet 2016, Kerajaan telah menurunkan kadar *threshold* iaitu jumlah jualan tahunan bagi tujuan pendaftaran skim FRS dari RM100,000 kepada RM50,000 dengan hasrat untuk membolehkan lebih ramai petani berskala kecil mendapat manfaat dari skim ini.

SOALAN (40)

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN
TARIKH : 9 NOVEMBER 2017
[KHAMIS]
DARIPADA : YB DATO' SRI BUNG MOKHTAR BIN RADIN
[KINABATANGAN]

SOALAN :-

YB Dato' Sri Bung Mokhtar Bin Radin [Kinabatangan] minta **PERDANA MENTERI** menyatakan apakah jangkaan impak lawatan Y.A.B Perdana Menteri ke Amerika Syarikat terhadap pertumbuhan ekonomi Malaysia serta ekonomi global.

95

JAWAPAN :-

Tuan Yang di-Pertua,

Untuk makluman Ahli Yang Berhormat, lawatan kerja Perdana Menteri ke White House pada 12 September 2017 merupakan jemputan daripada Presiden Donald Trump sempena ulangtahun ke-60 hubungan dua hala Amerika Syarikat (AS) dan Malaysia. Perbincangan semasa lawatan kerja ini telah merangkumi isu ekonomi, kemanusiaan dan juga keselamatan.

Dari sudut ekonomi, hubungan perdagangan dan pelaburan dua hala antara kedua-dua negara berada dalam kedudukan yang kukuh. Sehingga 2016, jumlah pelaburan langsung asing (FDI) AS ke Malaysia mencapai RM38.5 billion. Ini turut disokong oleh pelaburan langsung di luar negeri (DIA) Malaysia ke AS yang hampir mencecah RM5.2 billion. Dari aspek perdagangan pula, Malaysia masih mengekalkan lebihan dagangan dengan negara berkenaan. Pada 2016, AS merupakan destinasi eksport dan sumber import yang penting bagi negara, iaitu masing-masing berjumlah 10.2 peratus daripada jumlah keseluruhan eksport dan 8.0 peratus daripada jumlah keseluruhan import.

Ahli Yang Berhormat,

Dasar kemakmuran bersama yang diamalkan dalam hubungan Malaysia dengan negara lain akan memastikan setiap negara yang terlibat akan menikmati manfaat daripada perkongsian kemakmuran tersebut. Hubungan dengan AS juga tidak terkecuali. Negara maju sepertinya mampu menyediakan banyak peluang pasaran dan pelaburan kepada Malaysia.

Keputusan Kerajaan untuk menambah pelaburan ke AS telah didorong oleh potensi perolehan pelaburan yang lebih baik termasuk mempelbagaikan risiko pelaburan negara. Ini seiring dengan dasar semasa AS yang merancang pembangunan infrastruktur besar-besaran terutamanya bagi pembangunan semula bandar yang musnah dan terjejas teruk akibat bencana alam seperti ribut taufan dan banjir. Situasi ini dijangka memberikan impak positif kepada Malaysia, lebih-lebih lagi apabila Malaysia berada dalam kedudukan lebihan dagangan dengan AS. Keuntungan yang dijana melalui pelaburan ini turut akan menambah rizab asing negara dan seterusnya boleh membantu mengukuhkan nilai ringgit.

97

Hasil daripada lawatan kerja ini, Malaysia Airlines System (MAS) telah menandatangani perjanjian persefahaman bersama Boeing Aircraft Corporation bagi membekalkan 8 buah pesawat Boeing 787-9 dan membuka pusat fasiliti *maintenance, repair and overhaul* (MRO) yang dianggarkan bernilai hampir USD\$4 billion. Pembelian kapal terbang dan pembukaan fasiliti berkenaan sudah tentu akan menambah potensi pertumbuhan ekonomi negara di masa akan datang.

Sebagai sebuah ekonomi terbesar di dunia, hubungan baik bersama AS akan memberi kesan limpahan langsung terhadap ekonomi negara. Selain daripada pelaburan di AS, keyakinan yang ditunjukkan oleh AS terhadap Malaysia akan menarik perhatian negara lain terhadap kemampuan dan keupayaan yang dimiliki oleh Malaysia. Secara tidak langsung, ini akan meningkatkan daya saing negara dari segi penarikan FDI serta kebolehpasaran industri, produk dan eksport perkhidmatan Malaysia di arena antarabangsa.

Sekian, terima kasih.

9 November 2017